

筆記小說大觀

集

清牛應之編
雨窗消意錄下

進步書局校印

Blank page with faint vertical text on the left margin.

Vertical text in a decorative border, likely a title or chapter heading.

雨窗消意錄卷三

清 牛應之編

百菊溪齡總督兩江時。司道以下。多朋飲妓船。酣嬉無度。百心惡之。而不欲顯發。乃召一尉謂曰。某所有妓船。為我驅之。尉跋踏不敢應。百曰。投鼠忌器乎。以我命往何妨。尉請檄。百曰。無須也。持汝版來。即援筆書絕句曰。宛轉歌喉一串珠。好風吹送莫愁湖。緣何打漿忽忽去。煮鶴焚琴是老夫。尉持版往。眾官踉蹌而散。非特處置妥貼。亦見老輩風流。

山陰胡西垞。素行詭激。落魄揚州。屢謁盧轉運。不得見。至除夕。投詩云。莽莽乾坤歲又闌。蕭蕭白髮老江干。布金地煖回春易。列戟門高再拜難。庾信生涯最蕭瑟。孟郊詩骨劇清寒。自嫌七字香無力。封上梅花閣下看。盧見詩。即呼驢往拜。餽朱提數笏。山陰胡天游。以才學受知於任香谷。尚書啟運。薦試博學宏詞。既入都。邀館其家。情禮優篤。猶令狐楚之於義山也。會仲秋。葡萄新熟。紫珠翠葉。翳綴庭前。尚書顧天游曰。彼實垂垂矣。若能以儕淮險韻。刻劃其狀。當令某伶進酒。天游刻燭二寸。成詩四十韻。曰。葡萄生北地。甘果未容儕。漫似橙留尉。徒言荔走騮。中原驕織錦。大夏本如

稽來日隨天馬。珍時博郡鰓。那應伴印竹。曾詫旅崑厓。栽苑先丹若。誇奇比曲櫟。漸
絲看滿縣。爭植半籠街。一樹微藏曉。添幽得小齋。童聞新數額。客冷舊分荄。歲月繞
成把。支離凡抱骸。發春呼汲井。置落不煩柴。倩圓條蟠屈。隨龍上蟄埋。拏藤高屋起。
縛架碧霄排。翻水層篩網。行天爪擲釵。祝星稀實跌。怕霧苦吹靈。刷影眈眈旆。迴清
葉葉颿。酸齋經夏穰。味熟報秋佳。錯落珠銜鵲。鮮員卵毓靈。團將球綴幕。插訝箭駢
靱。戛戛梢檐舉。玲玲畫戶闔。枚驚千釘錯。結古百繩皆。部擁螺黏族。堆猜繭絡緡。拇
擎莊慣說。胆擠戲成排。見擬通身胆。環雕出目蛙。巧懸漚泡住。危累彈丸似。多覺欺
隣棗。貪猶敵庾鮭。囊疑空露積。鈴怪靜風吐。待摘心仍惜。巡觀手獨叉。湟勻明注慶。
煉細紫拋媧。未吮芳凝髓。先矜色關鞵。粉沾雲母膩。光逼水晶揩。輒謝金石切。津宜
貝齒潛。重鯁斤許料。密檢珎相差。內熱休頻論。中饒定可諧。偷防羞鳥雀。晴少蠢蜂
蝸。酒藏淪難值。詩痺渴抵痰。人窺雨餘館。涼破日斜階。淖蜜新輸翦。如瑳足笑娃。癡
憑須掙頤。碎拾穗翻葦。市貴形驕乳。霜甘候祭豺。數錢俱及飽。收實併堪懷。寒別關
門遠。肥憐攘性乖。豈知根入塞。不比橘踰淮。物理何須測。前威信莫涯。當年饒鑿空。
使者近誰偕。郡指河西外。虛聞產渥洼。一時傳誦。

康熙中年金陵詩人有三布衣一馬秋田一袁古香一為瀛客古香最老夙館康親王府為年少後至意頗輕之常短袁於王前一日王命宦者出一紙付客乃賀新婚詩韻限階乖骸埋四字外銀二封輕重各一能作詩者取重封留邸不能者持輕封作路費歸為辭不能袁獨咏云裴航得踐游仙約簇擁紅燈上綠階此夕雙星成好會百年偕老莫相乖芝蘭氣吐香為骨冰雪心清玉作骸更喜來宵明月滿團圓不為白雲埋王大稱賞為慚沮即日辭歸

鄭板橋最愛徐青藤詩嘗刻私印云徐青藤門下走狗鄭燮童二樹亦重青藤題青藤小像云抵死目中無七子豈知身後得中郎又曰尚有一燈傳鄭燮甘心走狗列門牆錢文端公庚午典試江西寫榜吏陳巨儒鬚鬢如雪自言年七十手寫文武榜三十有二求公贈詩公賦云桂籍憑伊腕力傳白頭從事地行仙自言作吏中書省曾侍朱衣四十年十月復寫武榜解首則其孫騰蛟也名初唱掀髯一笑筆墮於地巡撫阿公喜使告藩司彭公索詩使者立檐下待彭方有劇務幕客代作復不稱意乃遣騎迎蔣荅生蔣方飲酒肆戀不肯行敦促乃來則速者又四輩矣彭語之故蔣曰不知公有此急也即題一絕云榜頭題去笑開眉六十年來鬢若絲官燭兩行人第

一夜闌回憶抱孫時。

鄒泰和學士戊戌翰林和雅謙謹有愛貓癖。每宴客召貓與兒孫側坐與食必均。曰毋相奪也。督學河南按臨商邱畢出署失一貓。嚴檄督縣捕尋。令苦其煩用印文詳報云。卑職遣幹役四人挨家搜捕。至今逾限。憲貓不得。

有人餽得心大師雞子。師大嚼咽。人笑之。師作偈云。混沌乾坤一壳包也。無皮血也。無毛。老僧帶爾西天去。免在人間受一刀。

桐城張映沙。個儻負氣。喜詆諆。土俗呼叔叔為叔叔。有族弟某。鄉試分房。叔為大興縣丞。循例迎送。榜後門生有獻狐裘者。映沙賦詩嘲之云。恩旨分房第一遭。馬前迎送有椒椒。鹿鳴宴罷懷銀器。虎榜人來捏紙包。白髮門生雙膝屈。藍圖文字七篇高。莫言分校無他樂。夫婦同時著大毛。

蘇州太守孔南溪。風骨冷峭。權貴不敢以情干。青樓金蕊仙。以事挂法。一時交好。無能為之道地。乃遣人至白下。求袁簡齋關說。袁寄札云。僕老矣。三生杜牧。萬念俱空。只花月因緣。猶有狂奴故態。今春到治下。欲為尋春之舉。而吳宮花草。半屬虛名。接席銜杯了。無當意。惟女校書金某。含睇宜笑。故是矯矯於庸中者。遂同探梅鄧尉而

別刻下接蕭娘一紙道為他事牽引。就鞠黃堂。將有月缺花殘之恨。其一切顛末。自有令甲。憑公以惠文冠彈治之。非僕所敢與聞。只念此小妮子。蕉葉有心。雖知捲雨。而楊枝無力。祇好隨風。偶茵溷之誤投。遂窮民而無告。似乎君家宣聖復生。亦當在少者懷之之例。而必不以杖叩其脛也。且此輩南迎北送。何路不通。何不聽請於有力之家。而必遠求數千里外之空山一叟。可想見夫子之門牆。壁立萬仞。而非僕不足以替花請命耶。元微之詩云。寄語東風好擡舉。夜來曾有鳳凰棲。敬為明公誦之。孔得札後覆云。鳳鳥曾棲之樹。託擡舉於東風。惟有當作召公之甘棠。勿翦勿伐。而已。表又嘗遊蘇州。過京口。已解纜矣。適有妓與太守閭狎。守覺逐閭而置妓。妓感之。為謁廟祝釐。守怒其張更逮妓。將荷以校。客有告袁者。袁素好事。且與守善。因寄詩曰。東風吹散野鴛鴦。私爇神前一瓣香。為祝長官千萬福。緣何翻惱長官腸。樊川行矣。一帆斜。那有情留子夜家。只問千秋賢太守。可曾幾箇斫桃花。越旬日。守書覆袁。啟視只七字。曰。桃花依舊笑東風。

淮陽賀生。本舊家子。美丰姿。工詞翰。幼聘中表女。以兵燹流徙。不復相聞。賀落魄寓雁門僧寺。一日雪霽。有騶從入廟者。詢知為陝西李鎮軍。既夫人亦至。侍婢三數人。

一人特慧麗。賀目注神移。不能去。頃之聞夫人呼雪鴻詣殿。燕香竊喜。伺於欄下。往來遙尾之。玩其足跡。畫地為詩云。玉梅花下影。姍姍仙步凌。風自往還。一點靈犀通。不得祇留香。印在人間。適總鎮過。見詩疑之。顧問賀。賀不承。固詰。乃以情告。李雖將頗曉風雅。因與論詩。益奇之。請為記室。且許以婢贈。賀敬諾。偕至官署。李妝幣而嫁之。婚夕。展邦族。則固所聘中表也。喜極相持而慟。李聞亦喜。遂女雪鴻。後賀成進士官知府。李夫婦老無子。賀孝事焉。

尹文端公總督兩江時。冬日。招秦大士蔣士銓袁枚飲。曰。座上皆同館名流。宜各賦詩紀勝。蔣詩先成。首句云。卓午人停問。字車。公笑曰。此教官請客詩也。秦懼不肯落筆。袁亦知難而退。公不許。乃賦一律云。小集平泉夜舉觴。春風座上不知霜。偶然元老開東閣。難得羣仙共玉堂。公大喜曰。開口已包括全題矣。

袁簡齋六十三歲乃生子。時有族弟某觀察。在蘇州勾當公事。接江甯方伯陶公羽檄。意頗驚駭。發之。但有紅牋十字云。令兄隨園先生已得子矣。常州趙舍人詩云。佳問有人馳驛報。賀詩經月把杯聽。

袁簡齋乾隆甲戌游揚州。過宏濟寺。見題壁云。隨着鐘聲入梵宮。憑誰一喝耳雙聾。

梁欒不解無言旨。辜負拈花一笑中。山水爭留文字緣。脚跟猶帶九州烟。現身莫問三生事。我到人間廿四年。未署召生二字。袁愛其詩。錄而訪之年餘不得。久之乃知為蔣士銓。蔣聞。感其相知。寄詩云。鴻爪春泥迹偶存。三生文字繫精魂。神交豈但同傾蓋。知己從來勝感恩。遂訂交焉。又嘗過良鄉。見逆旅題壁云。滿地榆錢莫療貧。垂楊難繫轉蓬身。離懷未飲嘗如醉。客邸無花不算春。欲語性情思骨肉。偶談山水悔風塵。謀生消盡輪蹄鐵。輸與成都賣卜人。未書篁村二字。袁和其詩。有好疊花箋鈔彙去。天涯沿路訪斯人之句。後十餘年。有勞觀察者。言宰良鄉時。因館欽差潔舍。曾見此詩。愛其詞妙。戒館人勿巧。然亦不知篁村何人。又數年。於某方伯署中。晤會稽陶生元藻。乃知即篁村也。述前事。感慨久之。陶復賦詩云。匹馬曾從燕薊趨。橋霜店月已模糊。人如曠世星難聚。詩有同聲德未孤。自笑長吟忘歲月。翻勞相訪徧江湖。秦淮河上敦槃會。應識今吾即故吾。三間老屋夕陽村。底事高軒過此門。飛蓋翠搖新蘸墨。華燈紅照舊題痕。不教畫墁傭奴易。便勝紗籠佛殿尊。惆悵憐才青眼客。幾翻剪紙為招魂。

冒辟疆姬人董小宛有才藝。年二十七。以瘵卒。辟疆作隱梅庵憶語哭之。同人哀辭。

甚多。惟吳梅村絕句最佳。今錄其四。詩曰。珍珠無價玉無瑕。小字貪看問妾家。尋到白堤呼出見。月明殘雪映梅花。又云。念家山破定風波。郎按新詞妾按歌。恨殺南朝阮司馬。累儂夫壻病愁多。又云。亂梳雲髻下妝樓。盡室蒼黃過渡頭。鈿盒金釵渾拋卻。高家兵馬在揚州。又云。江城細雨碧桃春。寒食東風杜宇魂。欲弔薛濤憐夢斷。墓門深更阻侯門。蓋梅村身經喪亂。觸境傷懷。譬天寶宮人。談上皇舊事。雖常語亦覺悽動心脾也。

謝祖字繩夫。長樂之江田人。名家子。嗜酒落魄。歲暮有所逋負。縣令韓紹繫之。從獄中上詩二首。韓大驚。釋而禮焉。詩曰。陳情淚血叩蒼天。事去人非四十年。祖父乞骸沾帝祿。兒孫落魄負官錢。身長寄食丁猶斂。田已飛沙賦未蠲。安得于公開活路。此心一寸是龍泉。又長夜漫漫夢不成。蕉樓禁鼓已三聲。星河暗透西窗穴。鈴柝寒生北斗城。短褐不堪深淺雪。單衾難度短長更。何年早了公門賦。一把鋤犁一卷經。閩人徐孝廉惟和。溫雅有詩才。偶過武林。識一妓。別後妓遇閩人。即問徐孝廉。徐感其意。賦詩云。匆匆相見未分明。別後逢人便寄聲。萬里歸期看乳燕。一春心事付流鶯。柳枝猶記當年曲。豈寇難消此夜情。搥盡元霜三萬杵。夢中還見舊雲英。

萬曆己丑謝在杭與徐惟和。下第過杭州六和塔。愛其幽靜。各賦一詩。欲題壁而寺僧號呼。奈何浪芥吾璧。吾且取水滌之。在杭笑不復題。越三載在杭拜吳興司理行部至杭。詢之。則寺僧懼罪逸矣。在杭大笑。因復題云。雙旌五馬遶江城。驚起山僧合掌迎。三載重來渾似夢。終軍原是棄繻生。

閩縣陳孝廉下第落魄。謁其先世交某守。守拒不見。頃之有李孝廉挾憲臺書來守。禮接之甚恭。陳上詩云。莫作青衫老腐儒。黃堂那許拜階除。投來名刺留中久。死後年情到底疎。失路鰥生歸去夜。同袍嘉客宴回初。始知天府聯名籍。不及霜臺薦士書。守大慚。時楊叔向為大參。駐節延津。聞其詩。厚款之。訂交焉。

三山鄭汝昂工詩。且好滑稽。貧甚。一親知令廣東鄭寄以詩云。三尺兒童事未諳。飢來強扯我欄衫。老妻牽住輕輕語。爹正修書去嶺南。其人得詩。厚贈之。按青瑣集有張球獻呂許公一絕云。近日廚中乏短供。兒童啼哭飯籬空。內人低語向兒道。爺有新詩謁相公。鄭詩蓋本此也。

張船山檢討問陶美丰儀。能詩。工書畫。秀水金筠泉孝繼告其所親。願化作絕世麗姝。為執箕帚。無錫馬雲題燦贈張詩。亦有我願來生作君婦。只愁清不到梅花之語。

張作詩謝兩人曰。飛來綺語太纏綿。不獨青娥愛少年。人盡願為夫子妾。天教多結再生緣。累他名士皆求死。引我癡情欲放顛。為告山妻須料理。典衣早蓄買花錢。又名流爭現女郎身。一笑殘冬四座春。擊壁此時無妬婦。傾城他日盡詩人。祇愁隔世紅裙小。未免先生白髮新。宋玉年來傷積毀。登牆何事苦闖臣。

錢塘金壽門農客揚州。諸饅商慕其名。競相延致。一日有某商宴客於平山堂。金首坐。席間以古人詩句飛紅為觴。政次至某商。苦思未得。眾客將議罰。商曰。得之矣。柳絮飛來片片紅。一座譁然笑其杜撰。金獨曰。此元人詠平山堂詩也。引用綦切。眾請其全篇。金誦之曰。廿四橋邊廿四風。憑欄猶憶舊江東。夕陽返照桃花渡。柳絮飛來片片紅。眾皆服金博洽。其實乃金口占此詩。為某商解圍耳。商大喜。越日。以千金餽之。吳門葉天士桂。精於醫。求者如市。一日肩輿出。有鄉人揖道左求治。葉停輿診之。曰。六脈均調。奚病耶。鄉人曰。某所患者貧病也。聞公善治奇疾。故來求耳。葉曰。諾。因令拾道旁橄欖核種之。苗茁乃告我。鄉人如教。葉自是製方。必用橄欖苗。病家求橄欖苗。必於鄉人。鄉人益昂其價。期年遂小康焉。

福建林於川。官某縣教諭。有某生橫而好訟。林責之。生素驕。以為大辱。訟於府。知府全

某素貪生賄以洋銀五百金遂劾林姦賊生使其黨證成之林書生聞於世事不能自白竟坐戍新疆嘉慶元年以恩詔釋回將行全適以罪遣戍亦至新疆林具手版往謁置詩版中云雪風勢面上軍臺沙壅雙眸澁不開邊地苦寒君記取某年時月我曾來全方食殘咽而罷未幾病遂死

李中甫榕布政湖南時命州縣因訟繫者皆具姓名以聞有某縣繫囚獨多榕書絕句於冊首云虎押幾曾疏檻禁蛛絲何必苦膠黏相期夏籜朝朝解莫似春潮夜夜添知縣慚懼聽而釋者日數人半月皆盡嘗謂班館之苦甚於牢獄故國有明禁然民情官事變幻糾紛未可盡拘成法賢者不輕繫人亦求瘼之一事也

孫鼎臣子宗錫宗穀皆端介好學家居貧甚親故無相問者會歲暮暝庵賦長句遺之曰手翻遺集淚如麻心苦雕龍計總差翰苑文章推玉局蓬門風雪卧西華科名記在同人貴車笠盟荒古道賒手拂殘牋吟乞汝忍寒持謁孝標車聞者感愧稍稍周旋之

按二子後皆入翰林先時李集膏燭之朱詩不盡確也

寶靖胡巡撫寓居長沙就劉蛻讀書故地構園時招文士飲宴未幾胡死園鬻於武人楊翰重至其地則蛛絲罨戶鳥糞平階柳臥枯池藤穿壞塢蟬聲鴉聲與堂上呼

歟聲相應。慨歎久之。賦詩八章。其一曰。蛻叟閒園在。唐賢舊跡存。山公今易主。北海此開尊。野鳥驚游侶。鴛柯識舊村。酒邊意飛動。往事尚堪論。其二曰。欣遇奎垣日。蘭亭展楔初。留傳東武跡。摹勒北平書。老輩風流在。殘碑散漫餘。主人凋替盡。徒倚廢廊虛。其三曰。浩蕩王師下。牂牁毒霧開。時平名將返。秋老故人來。朝市身終隱。兵戈首重迴。淮南悲木落。攜客共登臺。其四曰。苦竹黃蘆外。何人理釣絲。寒廳蟻看劍。廢圃鹿聽詩。石洞閒雲入。花棚瘦竹支。蒼涼尋舊迹。感慨此心知。其五曰。老將幽燕去。空庭菊自花。柳荒無繫馬。草亂只藏蛇。水瀉疑琴韻。風高憶鼓撾。征車何日返。莫到夕陽斜。其六曰。壇席無前輩。吾思何道州。揮杯談五嶽。下筆問千秋。碑沒龍蛇隱。倉空烏鼠愁。古槐離橘在。歲月記悠悠。其七曰。太史能驅賊。元戎雅好文。旌旗逐名士。詩禮重將軍。橋接湘江水。樓藏嶽麓雲。湖壖揮手別。雨雪又紛紛。其八曰。同鎮西南徼。欖槍貫斗杓。孤城方火急。一旅倏兵銷。慘澹山川暮。崢嶸歲序遙。長歌聲澈越。林莽日蕭蕭。

浙有某紳字亞伯者。不宜於鄉里。或嘲以聯曰。包藏惡心。違父命。奪弟財。枉作京堂四品。圍成霸道。拜中丞。揖明府。得來洋餅三十。

袁簡齋宰江甯時。五月十日。天大風。白日晦冥。城有韓女。被風吹至銅井村。村去城九十里。明日村人送歸之。女已字李秀才。李疑風不能吹人遠去。必有姦。因控官。袁曰。古有風吹女子至六十里者。汝知之乎。李不信。袁取元郝文忠公陵川集示之。曰。郝公一代忠臣。甯作誑語。第當年風吹吳門女。竟嫁宰相。恐汝子無福耳。秀才讀詩大喜。姻好如故。總督尹繼美聞之曰。可謂宰官必用讀書人矣。其詩曰。八月十五雙星會。花月搖光照金翠。黑風當筵滅紅燭。一朵仙桃落天外。梁家有子是新郎。羊氏負從鍾建背。爭看足下來鬼物。雲鬢欹斜倒冠佩。須臾舉目視旁人。衣服不同言語異。自說吳門六十里。恍惚不知來此地。甘心肯作梁家婦。詔起高樓榜天賜。幾年夫壻作相公。滿眼兒孫盡朝貴。須知伉儷有因緣。富者莫求貧莫棄。

對聯有解頤者。康熙時。廣東詩僧石蓮。住海珠寺。交通公卿。寺塑金剛與彌勒環坐。題對聯云。莫怪和尚們。這般大樣。請看護法者。豈是小人。楊蘭坡題倒坐觀音像云。問大士緣何倒坐。恨世人不肯回頭。江西某題養濟院云。看諸君腦滿腸肥。此日共餐常住飯。想一樣鐘鳴鼎食。前生都是宰官身。或題禪堂云。無法向人說。將心替汝安。佛座云。大護法不見僧過。善知識能調物情。題戲臺云。做戲何如看戲樂。下場更

比上場難

乾隆時夏醴谷督學楚中。歲試題象日以殺舜為事。有一生文云。象不徒殺之以水。而并殺之以火也。不徒殺之以火。而又殺之以酒也。幕客大笑。欲批抹而置劣等。夏不可更閱其對。對云。舜不得於母。而遂不得於父也。舜雖不得於弟。而幸有得於妹也。通篇文亦奇警。夏拔置一等。可見當時學使無不讀書者。

沈總憲近思。在都無眷屬。項霜泉嘲之云。三間無佛殿。一个有毛僧。魯觀察之裕。性粗豪而屋小。署門曰。兩間東倒西歪屋。一箇南腔北調人。薛徵士雪。善醫而性傲。署門曰。且喜無人為狗監。不妨喚我作牛醫。

徐靈胎大椿。博學工醫。不喜時文。有刺時文道情云。讀書人。最不濟。爛時文。爛如泥。國家本為求才計。誰知道變作了欺人計。三句承題。兩句破題。擺尾搖頭。便是聖門高第。可知道三通四史。是何等文章。漢祖唐宗。是那一朝皇帝。案頭放高頭講章。店裏買新科利器。讀得來肩背高低。口角噓唏。甘蔗渣兒嚼了又嚼。有何滋味。辜負光陰。白白昏迷一世。就教他騙得高官。也是百姓朝廷的晦氣。

毛大瀛海客妻某氏能詩。初婚時。毛贈云。他日香閨傳盛事。粧臺先拜女門生。妻笑。

曰。要改一字。毛問何字。曰。門字改先字方妥。毛大笑。後寄毛家信云。出門七年。寄銀八兩。兒要衣裳。女要首飾。巧婦不能為無米之炊。此之謂也。至於年年被放。妾面增羞。此皆妾命不齊。累卿如此。夫復何言。

有士人游岱嶽至深處。忽聞石壁中語曰。何處經香。豈有轉世人來耶。剗然震響。石壁中開。貝闕瓊樓。涌現峰頂。有耆儒冠帶下迎。士人駭愕。問此何地。曰。此經香閣也。士請其義。曰。昔仲尼刪訂。垂教萬年。大義微言。遞相授受。漢代諸儒。去古未遠。訓詁箋註。類能窺先聖心。又醞樸未瀉。無植黨爭名之習。惟各傳師說。篤溯淵源。沿及有唐。斯文未改。迨乎北宋。勒為注疏十三部。先聖嘉之。諸大儒慮新說日興。漸成絕學。建是閣以貯之中。為初本。以五色玉為函。尊聖教也。配以歷代官刊之本。以白玉為函。昭帝王表章之功也。皆南面。左右則各家私刊之本。每一部成。必取初印精好者。按次時代。度置斯閣。以蒼玉為函。獎汲古之勤也。皆東西面。竝以珊瑚為簽。黃金作鎖鑰。東西兩廡。以沈檀為几。錦繡為茵。諸大儒之神。歲一來視。相與列坐於斯閣。後三楹。則唐以前諸儒經義帙。以纂組收為一庫。自是以外。雖著述等身。聲華蓋代。總聽其自貯名山。不得入此門焉。先聖之志也。諸書至于刻午刻。一字一句。皆發濃香。